



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

SOROTAN STATISTIK EKONOMI MALAYSIA, SIRI 6/2025

Ekonomi Malaysia terus mengukuh pada April 2025, disokong oleh disokong oleh pertumbuhan kebanyakan sektor dan pasaran buruh yang berdaya tahan

PUTRAJAYA, 26 JUN 2025 – Pada hari ini, Jabatan Perangkaan Malaysia (DOSM) mengeluarkan **Sorotan Statistik Ekonomi Malaysia (MESR), Siri 6/2025**. Edisi ini memberi tumpuan kepada statistik terkini yang dikeluarkan pada April 2025 dan beberapa statistik akan datang untuk Mei 2025. Selain itu, edisi ini turut memuatkan artikel tambahan bertajuk "Mengukur Hubungan Antara Petunjuk Keyakinan dan Pertumbuhan KDNK di Malaysia", yang mengetengahkan peranan Petunjuk Keyakinan sebagai indikator penting untuk prestasi ekonomi.

Dalam prospek global terkini, Bank Dunia menjangkakan pertumbuhan global akan menyederhana kepada 2.3 peratus pada 2025 berbanding anggaran 2.8 peratus pada tahun 2024, sekali gus mencatat kadar pertumbuhan paling perlahan sejak krisis kewangan global 2008, tidak meliputi tempoh kemelesetan global sebenar. Sementara itu, Pertubuhan Kerjasama dan Pembangunan Ekonomi (OECD) meramalkan senario yang lebih optimistik, dengan pertumbuhan diunjurkan lebih perlahan daripada 3.3 peratus pada 2024 kepada 2.9 peratus pada 2025. Unjuran yang lebih sederhana ini mencerminkan cabaran berterusan, termasuk kadar faedah yang kekal tinggi, ketidaktentuan dasar ekonomi global serta peningkatan ketegangan perdagangan, yang secara keseluruhannya mendorong pendekatan lebih berhati-hati dalam membuat keputusan perniagaan dan pelaburan di peringkat global.

Menjelaskan trajektori ekonomi Malaysia, Ketua Perangkawan Malaysia, Dato' Sri Dr. Mohd Uzir Mahidin menyatakan, "Ekonomi domestik Malaysia pada suku tahun pertama 2025 mencatatkan pertumbuhan merangkumi kebanyakan sektor. Sektor Perkhidmatan kekal sebagai pemacu utama, berkembang 5.0 peratus, disokong oleh

perdagangan borong dan runcit, pengangkutan dan penyimpanan serta perkhidmatan perniagaan. Sektor Pembuatan meningkat 4.1 peratus, didorong oleh pengeluaran kukuh produk elektronik, pemprosesan makanan dan produk berasaskan getah. Sektor Pertanian pula mencatat pertumbuhan sederhana 0.6 peratus, berikutan peningkatan dalam subsektor perikanan dan subsektor lain. Sebaliknya, sektor Perlombongan dan pengkuarian menguncup 2.7 peratus, disebabkan penurunan pengeluaran minyak mentah dan gas asli.”

Dalam mengekalkan pertumbuhan, sektor Pembuatan merekodkan nilai jualan RM160.6 bilion pada April 2025, mencatatkan peningkatan 4.8 peratus berbanding tempoh sama tahun sebelumnya, dipacu terutamanya oleh prestasi kukuh dalam subsektor Makanan, minuman & tembakau (11.1%), Produk Elektrik & elektronik (9.8%), dan Produk mineral bukan logam, logam asas dan produk logam (4.6%). Bagaimanapun, pada asas bulan ke bulan, nilai jualan menurun 2.3 peratus berbanding Mac 2025. Dari segi prestasi industri, Indeks Pengeluaran Perindustrian (IPP) Malaysia meningkat 2.7 peratus tahun ke tahun pada April 2025, disokong oleh pertumbuhan 5.6 peratus dalam sektor Pembuatan. Sebaliknya, sektor Perlombongan dan Elektrik masing-masing mencatatkan penyusutan 10.0 peratus dan 1.6 peratus.

Dari perspektif yang lebih meluas terhadap sektor Perkhidmatan Malaysia, segmen Perdagangan Borong & Runcit mencatatkan jumlah jualan RM151.7 bilion pada April 2025, meningkat 4.7 peratus tahun ke tahun, didokong oleh peningkatan dalam Perdagangan Borong (5.5%), Perdagangan Runcit (4.7%) dan Kenderaan Bermotor (2.1%). Walau bagaimanapun, jualan secara bulanan merosot 1.5 peratus, dengan semua subsektor mencatatkan penguncupan. Indeks Volum untuk sektor ini meningkat 4.3 peratus tahun ke tahun kepada 160.6 mata namun menurun 1.3 peratus secara bulanan.

Dari aspek perdagangan luar negeri, jumlah dagangan pada April 2025 melonjak 18.2 peratus kepada RM261.9 bilion, disokong oleh pertumbuhan ketara dalam kedua-dua eksport dan import. Eksport barangan Malaysia meningkat 16.4 peratus, terutamanya didorong oleh pertumbuhan berterusan dalam barangan Elektrik & Elektronik (E&E). Sementara itu, import berkembang lebih laju pada 20.0 peratus, turut disokong oleh permintaan kukuh terhadap barangan E&E. Berikutan itu, imbalan dagangan menyusut 33.0 peratus berbanding tempoh sama tahun sebelumnya. Secara bulan ke bulan, eksport merosot 2.7 peratus, manakala import meningkat 14.1 peratus. Pada Mei 2025, jumlah dagangan bernilai RM252.5 bilion, mencatat kenaikan

2.6 peratus berbanding tahun sebelumnya, terutamanya disumbangkan oleh pertumbuhan import 6.6 peratus.

Dari segi harga, trend harga di Malaysia pada April 2025 mencerminkan kestabilan berterusan di peringkat pengguna tetapi tekanan meningkat di peringkat pengeluaran. Inflasi utama kekal stabil pada 1.4 peratus, sama seperti Mac, didorong oleh kenaikan harga berterusan dalam kategori utama seperti Penjagaan diri, perlindungan sosial & pelbagai barangan & perkhidmatan, yang meningkat kepada 4.1 peratus, diikuti Pendidikan pada 2.3 peratus dan Perumahan, air, elektrik, gas & bahan api lain 2.0 peratus. Sebaliknya, trend inflasi lebih sederhana dicatatkan dalam kumpulan Makanan & minuman; Rekreasi, sukan & kebudayaan serta Kesihatan. Dari sudut pengeluaran, Indeks Harga Pengeluar (IHPR) mencatat penurunan 3.4 peratus tahun ke tahun pada April, berbanding kejatuhan 1.9 peratus sebelumnya. Penyusutan ini dipacu terutamanya oleh penguncupan berterusan dalam sektor Perlombongan (-17.8%), Pembuatan (-2.6%) dan Bekalan elektrik & gas (-0.6%), meskipun sektor Pertanian, perhutanan & perikanan serta Bekalan air masing-masing mencatat peningkatan 2.6 peratus dan 0.9 peratus. Secara bulanan, IHPR merosot 1.0 peratus, meneruskan penurunan 0.6 peratus yang direkodkan sebelum ini. Pada Mei 2025, Malaysia mencatat kadar inflasi 1.2 peratus, manakala IHPR terus merosot kepada 3.6 peratus.

Dato' Sri Dr. Mohd Uzir Mahidin turut menegaskan bahawa pasaran buruh Malaysia terus mengukuh pada April 2025, dengan jumlah guna tenaga meningkat 2.8 peratus tahun ke tahun kepada 16.82 juta orang, dan mencatat pertumbuhan sederhana 0.2 peratus berbanding bulan sebelumnya. Selaras dengan trend positif ini, kadar pengangguran menurun kepada 3.0 peratus, menunjukkan bilangan pengangguran menyusut 5.5 peratus secara tahunan dan 0.7 peratus secara bulanan. Pada masa sama, bilangan tenaga buruh berkembang 2.5 peratus tahun ke tahun kepada 17.34 juta orang, manakala kadar penyertaan tenaga buruh meningkat kepada 70.8 peratus, naik 0.2 mata peratus berbanding April 2024 dan 0.1 mata peratus berbanding Mac 2025.

Indeks Pelopor Malaysia memberi petunjuk prospek ekonomi yang lebih sederhana dengan peningkatan marginal pada April 2025. Peningkatan tahun ke tahun ini mencerminkan daya tahan asas ekonomi dan memberi gambaran kelembapan jangka pendek, disokong oleh asas ekonomi domestik yang stabil.

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15)

yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan Open Data Inventory (ODIN) 2024/25 yang dikeluarkan oleh Open Data Watch (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Dikeluarkan oleh:

**PEJABAT KETUA PERANGKAWAN
JABATAN PERANGKAAN MALAYSIA
26 JUN 2025**

Lampiran 1: Petunjuk Ekonomi Bulanan




Nilai Jualan Perdagangan Borong & Runcit

4.7%
APRIL 2025



Indeks Volum Perdagangan Borong & Runcit

4.3%
APRIL 2025



Eksport

-1.1%
MEI 2025




Import

6.6%
MEI 2025



Indeks Harga Pengguna (IHP)

1.2%
MEI 2025



Indeks Harga Pengeluar (IHPR) Pengeluaran Tempatan

-3.8%
MEI 2025

